

01

望荆山诗

奉义至江汉，始知楚塞长。
南关绕桐柏，西岳出鲁阳。
寒郊无留影，秋日悬清光。
悲风挠重林，云霞肃川涨。
岁晏君如何，零泪沾衣裳。
玉柱空掩露，金樽坐含霜。
一闻苦寒奏，再使艳歌伤。

02

渡西塞望江上诸山诗

南国多异山，杂树共冬荣。
潺湲夕涧急，嘈嘈晨鷓鸣。
石林上参错，流沫下纵横。
松气鉴青藓，霞光铄丹英。
望古一凝思，留滞桂枝情。
结友爱远岳，采药好长生。
当畏佳人晚，秋兰伤紫茎。
海外果可学，岁暮诵仙经。

03

贻袁常侍诗

昔我别楚水，秋月丽秋天。
今君客吴坂，春色缥春泉。
幽冀生碧草，沅湘含翠烟。
铄铄霞上景，懵懵云外山。
涉江竟何望，留滞空采莲。
驻情光气下，凝怨琴瑟前。
珠贝性明润，兰玉好芳坚。
不以宿昔岨，怀愧期暮年。

04

惜晚春应刘秘书诗

烟景抱空意，蘅杜缀幽心。
心忧望碧叶，涵影顾青林。
风光多树色，露华翻蕙阴。
水苔方下蔓，石萝日上寻。
霞衣已具带，仙冠不持簪。
徒为多委郁，精魄还自临。
始获琼歌赠，一点重如金。
山中有杂桂，玉沥乃共斟。

05

步桐台诗

客子畏霜雪，忧至竟悠哉。
绮帷生网罗，宝刀积尘埃。
思君出汉北，鞍马登楚台。
岁彩合云光，平原秋色来。
寂听积空意，凝望信长怀。
蕙芬自有美，光景讵徘徊。
山中忽缓驾，暮雪将盈阶。

06

游黄蘗山

长望竟何极，闽云连越边。
南州饶奇怪，赤县多灵仙。
金峰各亏日，铜石共临天。
阳岫照鸾采，阴溪喷龙泉。
残杙千代木，嵒峯万古烟。
禽鸣丹壁上，猿啸青崖间。
秦皇慕隐沦，汉武愿长年。
皆负雄豪威，弃剑为名山。
况我葵藿志，松木横眼前。
所若同远好，临风载悠然。

07

还故园诗

汉臣泣长沙，楚客悲辰阳。
古今虽不举，兹理亦宜伤。
山中信寂寥，孤景吟空堂。
北地三变露，南檐再逢霜。
窃值寰海辟，仄见圭纬昌。
浮云抱山川，游子御故乡。
遽发桃花渚，适宿春风场。
红草涵电色，绿树铄烟光。
高歌傖关国，微叹依笙簧。
请学碧灵草，终岁自芬芳。

08

陶征君潜田居

种苗在东皋，苗生满阡陌。
虽有荷锄倦，浊酒聊自适。
日暮巾柴车，路暗光已夕。
归人望烟火，稚子候檐隙。
问君亦何为，百年会有役。
但愿桑麻成，蚕月得纺绩。
素心正如此，开径望三益。

09

渡泉峽出諸山之頂

岑崟蔽日月，左右信艰哉。
万壑共驰骛，百谷争往来。
鹰隼既厉翼，蛟鱼亦曝腮。
崩壁迭枕卧，斩石屡盘回。
伏波未能凿，楼船不敢开。
百年积流水，千岁生青苔。
行行讵半景，余马以长怀。
南方天炎火，魂兮可归来。

10

赤亭渚诗

昨发赤亭渚，今宿浦阳汭。
方作云峰异，岂伊千里别。
芳尘未歇席，零泪犹在袂。
停舫望极浦，弭棹阻风雪。
风雪既经时，夜永起怀思。
汎滥北湖游，苕亭南楼期。
点翰咏新赏，开帙莹所疑。
摘芳爰气馥，拾蕊怜色滋。
色滋畏沃若，人事亦销铄。

子衿怨勿往，谷风诮轻薄。
共秉延州信，无惭仲路诺。
灵芝望三秀，孤筠情所托。
所托已殷勤，祇足搅怀人。
今行嶠嵎外，衔思至海滨。
覩子杳未偃，款睇在何辰。
杂佩虽可赠，疏华竟无陈。
无陈心悁劳，旅人岂游遨。
幸及风雪霁，青春满江皋。
解缆候前侣，还望方郁陶。
烟景若离远，未响寄琼瑶。

11

西洲曲

忆梅下西洲，折梅寄江北。单衫杏子红，双鬓鸦雏色。
西洲在何处，两桨桥头渡。日暮伯劳飞，风吹乌臼树。
树下即门前，门中露翠钿。开门郎不至，出门采红莲。
采莲南塘秋，莲花过人头。低头弄莲子，莲子青如水。
置莲怀袖中，莲心彻底红。忆郎郎不至，仰首望飞鸿。
鸿飞满西洲，望郎上青楼。楼高望不见，尽日栏干头。
栏干十二曲，垂手明如玉。卷帘天自高，海水摇空绿。
海水梦悠悠，君愁我亦愁。南风知我意，吹梦到西洲。